

古丈坪廳志卷十二祥災目錄

降祥降災天惟德用日尹月卿視彼輿誦爰鑒古初惕此肆縱人事  
天時道宜兼綜志祥災第五  
祥災第五

序考總序考一

吉祥善事通考祥災之一

序通考序考一

一 廳治開始成立之由來吉祥善事之一

古丈坪改土歸流通考一

古丈坪底定通考二

古丈坪設永順同知治通考三

古丈坪廳志

卷十二

一

古考坪永順同知治改爲永順府古丈坪捕督同 治通考四

古丈坪設專營通考五

古丈坪廳設屯防苗防通考六

古丈坪廳督捕治改爲撫民廳定疆域通考七

古丈坪書作古丈坪通考八

古丈坪廳始有學校通考九

古丈坪廳善事之大凡通考十

古丈坪廳善事未及致詳者通考十一

二 廳民生滋息之由來吉祥善事之二

國恩通考十二凡四條

錢漕之恩

俸餉之恩

兵米之恩

軍事之恩

天時通考十三

地氣通考十四

三 建廳以來所發見之祥瑞吉祥善事之三

人家 通考十五

物類 通考十六

災變禍難考異祥災之二

序考異序考二

一 農田地之災患災變患難之一

古丈坪廳志

卷十二

二

早乾考異一

水溢考異二

蟲孽考異三

二 民居之災患災變患難之二

火災攷異四

補攷異

序補攷序攷三

一 農田之災患補

早乾補攷異一

水溢補攷異二

二 民居之災患補補攷異三

三 兵事消弭攷  
祥災攷預備策  
序攷策  
原序  
愛民第一  
課士第二  
養兵第三  
通商第四  
勸工第五  
重農第六  
明醫第七

古丈坪廳志

卷十二

三

卷下

尊君國第一  
審官職第二  
慎財用第三  
講交涉第四  
厘刑政第五  
原跋  
今跋

以上祥災第五吉祥善事通攷凡十二爲通考十有六災變禍難考異凡三爲考異五補考異凡二爲考異補四祥災考預備策文兵事消弭考爲考異一爲篇十有二是爲古丈坪廳志第十二卷

古丈廳志卷十二

祥災第五

知撫民事董鴻勳湘船□

序考

總序考一

洪範五行志後世以爲附會後世史官雜記祥異符瑞或比附或不比附各以其例爲之然哲謀恭肅又古聖賢以爲日新之盛德風雨燠寒時古聖賢以爲消息之相通在雞眚犬痾固有泥於迹象而麟遊鳳至實來應於修和窺天測地之學日精窮高極遠素質求形造物亦萬物之一皆電體之所含一切災祥若皆非有所應響此策人力以前進退天運於無權固競力之微助乃人力有限學有窮時神明之說終不可泯古丈坪廳邊郡也而有苗雜居信巫崇神若一日所遇之善否皆生平之德與孽有以致之其不

得直於官者吃血盟誓無不解者聖人神道設教意固如此而竊以爲猶有進焉相在爾室尙不愧於屋漏屋漏之神臨之影衾之地出王之地儼若昊天臨之神託於物而心寄於神斯天之鑒觀有赫特別影之神衾之神屋漏之神各有一定局曹斯誕矣而又求其人物以實之姓名形象一切宮居嗜好無一而不神而人物之人物之而神之斯尤誕之甚矣然果人而有神道則以其人而神愈可奉以自儆災祥之降也愈可憑愈可以進善而退惡故志古丈坪廳而必及災祥也宜矣此其間人謀之臧居其太半天時地運之無可奈何者居其十之三神謀之及亦居其一二崇實驗惕虛器交策而並前德其可以日新亂其可以永弭矣光緒丁未孟夏初吉董鴻勳識

吉祥善事通考 祥災之一

序通考 序考一

人民仁壽世運康平出幽谷而喬木易左衽而冠裳田有變歧之麥桑無附枝之葉訟庭花落爾室風和禮讓孝敬尊親任卹干戈永息牛犢盈疇鑄劍戟爲農器以詩書爲讀法此皆古丈坪廳之所以休養生息長爲

盛世之民永享太平之福之吉祥善事也以神明之鑒臨不爽傲其夙夜以

國法之彰瘡無私戒其行止以官司之平爭禦患消萌釁於無形以父老之嘉行懿訓排紛難於一日不有君子其能廳乎爲通考之略以先後爲序一廳制成立之由來二廳民繁庶之由來凡此

人謀之善而實

神謀之有以策之也天時地運若無與人謀然努力耕農乃穫有秋和氣薰蒸乃有人家物類一切之禎祥是皆人之善謀靖強聰慧不聞天厲不苦弱貧以成諸種之吉祥善事則又皆

神謀陰有以助之成八蜡通而伊耆氏之治盛門社立而有嫫氏之業昌報本反始歸功於

神非象教一切教之說所得與也讀是志者若有人謀

神謀之往來於心目則一凡建置於輿圖之上民族物產之麗於輿圖若者爲古丈坪廳之人物若者爲古丈坪廳之人之藝文其可敬與其可推與是爲通考之序孟夏初吉鴻勳又識  
一廳治開始成立之由來吉祥善事之一

一古丈坪改土歸流喜祥善事一之一 通考一

周一德山東金鄉人康熙癸未侍衛官至衡州協副將雍正三年署彝陵鎮事總督傅敏語云容美土司田旻如殘淫不法土人如在湯火中將籌所以拯之一德曰旻如陰悍諸司畏懾地處險塞不可遽取桑植一司爲其後戶永順保靖二司乃其犄角撫數司郡縣之則容美自困由長陽施南用顛救之民宣慰勞來必內變可反掌定也制府驥之遂移暑九谿協經營其事一德率輕騎數十人前駐白巖洞傳桑植諸營社把給酒食諭以□眾□把悉泥首聽命一德乃入巡清戶口畫方畧設卡防以阻容美之侵暴仍賚桑之社把以錦衣駿騎令爲前導徑赴永保等處永之士人初猶玩抗時駐營鬼灘謀知岸有伏波遺記今年月日應我倒銅柱

令爾等爲中國良民永人疑皆蟻山憑巖持鎗弩以觀公從容焚香拜廟畢出詣柱前舉臂撼柱柱應手倒永人驚惶卽匍匐曰公天神也謹乞命遵約束於是風聲所至除道懽迎計周歷三月而桑永保三司所領茅岡忠建施溶洞等十七司盡入版圖田酋果爲其逼而斃此爲永順入

皇朝版圖之始亦卽古丈坪入版圖之始而廳治肇基於此矣按有一說白巖有二明時保靖土司有五寨長官司蘆荻杜望朱沱鳥引白崖後白崖歸永順餘歸鳳凰廳非元明時永順三州六長官白崖洞長官之白崖彼乃今龍山縣治白崖里地以今地望考之一德前駐白巖洞傳桑植諸營旗社把是由九谿先至龍山之白巖洞後乃徑赴永保等處勢非能先至今廳治之白巖此白巖

洞非廳之白巖洞明矣

然以爲永順三州六長官之白巖洞長官非廳境之白巖洞則似亦難□苗防備覽明言古仗坪一帶乃永順宣慰六長官司之三白巖洞施溶洞田家洞故地今皆在境或連境無緣更在四五百里外之龍山縣治且苗防備覽所載古仗坪之苗土村寨撫民旣設以後疆域所畫於廳境外者不過田家洞王家洞五六寨耳餘皆如前當日不應疏略至此

鬼灘在廳境青魚灘之下一二里餘中間麻灘一灘耳去會溪坪之銅柱尙一二十里此所搖柱是否又一銅柱馬氏世有湖南自稱伏波之後故永辰一帶洑波廟甚多兼祀興墳父子

古人立國建邑必有報功賽祭之典以繫人心而追本始我朝之

制府廳州縣祭祀有秩咸用無缺惟古丈坪廳制已百年一切應奉之

壇廟無有議及者甚矣以彝陋置之而民間各以其意爲祀非君師統繫民神之主之意也如欲化民成俗其必君宗冢土恪敬將事故下車以來首議建

皇殿

文廟以次建立廳州縣應有之祀

文廟前例附名官鄉賢節孝各祠擬彙案請入以鼓勵人心而應入名官各人先因其事別之以存於志因述其畧於此考之後如此上所言古丈坪之幸不終淪於土而又不以兵戈戰勝塗毒斯人而得入版圖也則百世當祀者如

湖廣總督傅敏知人善任之功後陞鎮筵鎮調任  
京師勇健營左翼總兵是時署九谿協周一德運籌綏服之功皆  
宜爲位於古丈坪廳名宦祠以報其開始廳治位曰

湖廣總督傅公敏

勇健營左翼總兵前署九谿協衡州協副將陞鎮筵鎮總兵官周  
公一德

按周一德苗疆功甚多開築永綏城於吉多坪其功尤偉以非廳  
事故不詳考

楊凱江南儀徵人武進士康熙六十年爲鎮筵前營遊擊兇苗出  
劫屢擒而置於法雍正五年擢辰州副將領兵闢桑植司時永順  
彭肇槐內向凱諭以獻土歸流七年調永順副將九年陞鎮筵鎮

終湖廣提督

彭肇槐永順宣慰司宏海子也雍正四年保靖土司骨肉相殘桑  
植土司暴虐不仁皆奉

旨改土歸流肇槐撫永順恭順無過能輯和人民土司鄰郡皆稱  
其賢獨能慕化獻土懷誠時楊凱以桑植副將帶兵彈壓保靖道  
經永順肇槐以意商之楊嘉其議肇槐遂不謀於舍把人等率子  
星燧具呈督撫請題情願改土歸流並永安插江西祖籍奉  
勅引

見奏對稱准其請授參將賞銀一萬兩予以拖沙喇哈番世襲罔  
替着將家屬安插原籍江西吉水縣遂改流建府永順千百年之  
草昧得被仁義禮樂之化皆彭肇槐功也至今土人稱以彭王或

土王祀之甚虔吳越納土遂修錢氏之祀况其千年撫土仍歸衣  
錦之鄉尤非錢氏及他僭竊侯封者比宜爲楊與肇槐之位於古  
丈坪廳名宦祠位曰

湖廣提督故永順辰州副將楊公凱

欽授參將拖沙喇哈番世襲罔替故永順宣慰彭肇槐

古仗坪底定

乾隆六十年苗民歸化已百年乃復弄兵潢池調兵七省轉鬪千里自乙卯正月用師至丁巳二月大功告竣其間繫乎古丈坪者考之

乙卯乾隆六十年正月十三日貴州大寨苗石柳鄧糾衆滋事陷大塘長行舖各汛

十九日湖南永綏廳黃瓜寨苗石三保鳳凰廳鴨保寨苗吳隴登蘇麻寨苗吳半生乾州廳平隆苗吳八月糾眾滋事永綏保靖各苗寨俱應之

是年閏二月楚督畢沅至辰州與巡撫姜晨奏赦永順了寨寨土人張廷仲廷仲之子榮炳糾合土人數百名禦苗打仗頗獲首虜

按了乃廳屬廷仲另有傳

三月二十六日提督穆克登阿統領額勒登保分兵兩路進攻蘭草坪苗潰大軍進營蘭草坪

四月初三日統領等克榔木坨三路各有殺獲大軍移營榔木坨七月初二日永順協副將慶溥擊退古仗坪撲卡賊匪並獻首虜奉

旨賞大烏巢河出力及隆團古仗坪兵丁一月錢糧

二十一日大軍攻古仗坪提督花連布分克狗腦地上下猿猴等寨

二十三日諸軍克古丈坪奉

旨賞打仗兵丁及屯練等一月錢糧

八月初十日大軍攻克隴巖等處進營楊柳坪奉  
旨賞打仗奮勇兵丁查明給一月錢糧

丙辰嘉慶元年四月十八九日巡撫姜晨調大小章土蠻與官兵  
夾攻苗匪於楠木橋黃連山等處大破之乘勝渡河遂復河溪  
五月十三日貝子福康安卒於軍和琳繼總軍事湖廣提督劉君  
輔宜昌鎮總兵張廷彥等分兵兩路會擒首逆石三保於土蠻哄  
哄寨

二十日奉

旨查明奮勇打仗前次未得賞給兵丁各賞一月錢糧

八月初十日湖南糧道成甯調補辰沅永靖兵備道調汀州府同  
知傅鼎補鳳凰廳同知

古丈坪廳志

卷十二

十一

三十日太子太保宣舅伯和琳卒於軍

按宣勇伯文襄王均有功於古應祀古丈坪廳名宦祠

九月初一日領侍衛內大臣額勒登保巡撫姜晨共總軍務額公  
戰績尤多應祀於古名宦祠

永順協副將慶溥亦應祀古名宦祠

丁巳嘉慶二年正月初二日首逆吳廷義石老喬等獻俘京師二  
月初八日至事平諸逆以次就誅惟吳隴登賞四品翎頂吳廷梁  
賞五品翎頂以擒石三保之子及諸逆家屬投誠也至二月初八  
日事平

先是乙卯四月總督畢沅巡撫姜晨招永順龍鼻巖等處土苗石  
兆元等數十寨俱詣辰州投誠故古仗坪底定最易云

古丈坪設永順同知

雍正四年王柔字東牟山東福山人貢生雍正元年乾州廳同知升分巡辰沅靖道駐鳳凰廳才足任事永順土司彭肇槐願改土歸流柔親度其情形入

覲爲奏請得允於是雍正四年設永順保靖二同知隸辰州府桑植同知隸岳州府

按此永順一同知治耳其疆域之大凡今府所屬除保桑二同知所轄外皆同知所轄跨今廳及永順龍山縣桑植之一隅地其事權之宏並可想見 苗防備覽險要古丈坪條言舊永順同知駐此是指戊申得請所設永順同治而言是爲古丈坪有流官之始而後之永順府一切官制皆在同知後矣詳建置

古丈坪永順同知治改爲永順府古丈坪督捕同知治

雍正七年己酉改設永順府裁三同知庚戌柔爲辰永沅靖道兼職副將闢六里築永綏城於吉多坪以非廳事不備載

按督捕同知之設當在是時同知既改知府治猛崗今府治舊同知仍設改爲督捕而永保兩縣田王等六保畫於治下是時疆域遂縮小而至於無以土地雖畫區界而實隸之縣籍事權則祇有保靖縣及永順縣十八保之補務又實祇有所畫之田王等保之權蓋去其大半只餘小半又小半 是時古丈坪若幾無特殊之觀矣然而王柔之功宜亦祀於名宦祠位曰辰沅永靖道兼職副將王公柔

又如祀通省郡縣名官趙恭毅申喬有功苗疆宜位曰

都察院左都御史前湖南巡撫謚恭毅趙公申喬  
其他通祀名宦者例皆應爲以祀

古丈坪廳設營汛

嘉慶二年設古丈坪營其詳見營汛說營汛紀不複

古丈坪廳設屯田礮卡苗防

嘉慶十年 奏准古丈坪廳設屯防苗防礮卡是事終始成之者  
辰沅道傅鼎鎮鎮富志那發議於巡撫姜晟成之者巡撫阿林  
保古自是百年太平至今矣宜爲位以祀雖傅富有專祀例仍得  
入其詳見前位曰

湖廣總督畢公沅

雲貴總督前湖南巡撫姜公晟

古丈坪廳志

卷十二

十三

湖南巡撫阿公林保

巡撫銜湖南按察司予謚壯肅傅公鼎

鎮筵鎮總兵富公志那

古丈坪廳督捕改爲撫民廳

道光二年湖廣總督陳巡閱過境以今昔情形不同奏准改建撫  
民廳治詳見官司紀自是古丈坪廳漸有土地權至是距永順同  
知之建立百有餘年而土地之範圍並小狹於督捕權力較專可  
以治其民矣宜祀名宦祠位曰

湖廣總督陳公若霖

按是時撫民初建同知譚震有吏才慈惠愛人首請建學爲時所  
尼其德澤至今未忘宜祀名宦以已見紀循良不重記凡官司之

有德政應入祠者均於紀循良見之例此

按雍正四年設永順同知七年設督捕同知至道光三年奏准撫民其間沒百餘年任同知者甚多豈無善政堪舉者今並無姓名可考其湮沒良可慨也然自設同知雖三變其制而古丈坪之涵濡德化父子兄弟夫婦相保以綿其世而樂其樂利其利十倍於土司之世則設同知實古丈坪吉祥善事之尤大者是時公牘

奏案仗猶作文不知何時改易蓋亦偃武修文之嘉兆辨又吉祥善事之一端嗣後志上文皆從今文不復以時代辨讀者諒之永順各鄉土司時爲五十八旂曰辰利東西南北雄將能精銳愛先鋒左韜德茂親勳策右畧靈通鎮蓋心武敵兩心飛義馬標衝水戰湧祥龍英長虎豹嘉威捷福慶凱旋智勝功以七字爲句

每一字一旂共五十六旂後添設請謀二旂共爲五十八旂此外更有戎臘鑲苗米房吹鼓手六旂伴僮七旂長川旂散人旂旂各有長管轄戶口分隸各州司而統屬於總司有事則調集爲軍以備戰鬪無事則散處爲民以習耕鑿除割南北旂歸桑植餘歸龍山之外在永境者則辰東雄將銳愛略鑲武標戰龍威各旂之半並西能精德勳靈忠敵星義衝水英長豹智功各旂也又福字一旂則係土司宗族散處各鄉今分屬永龍兩邑

按永順亘慰司分爲永順龍山二縣後又建古丈坪撫民一廳又故有南北兩旂割入後之桑植縣則從前以古丈坪爲治之永順同知實有今一廳二縣及桑植舊割之南北兩旂泱泱大風未數年而爲有政事無土地之督捕廳應又未幾而始有初土地之小半

政事之權之大半以迄於今廳制仍未完全忽忽二百年其何以振起古廳以致比於上國哉

古丈坪廳割永順之地而建撫民廳治未知得五十八旂及諸散旂之若干旗西英功全得西英功三字餘無同者無可考矣

古丈坪廳始有學校

古丈坪廳自改流至今二百年初改撫民廳治卽請建學未得始祇有苗義學二處後設鍾英義塾課士始有通經與科目者光緒二十八年奉文興學二十九年始改義塾爲小學堂三十二年乃請建

文廟開中學並設立師範傳習所徧設兩等小學堂以廣教育而宏生計皆古丈坪廳文化之基也詳見建置各篇古丈坪廳吉祥

善事之大凡

通考十一

古者養先於教既富方穀今自去年秋冬以來講求礦務疏河種植種植已略者成效如輿圖物產所繪所誌礦產雖紅利未見而始但求煤未幾得鐵得鋼得金銀銻十層紙礦來者無窮其利尤豐此蠶桑百種之業與金銀煤鐵諸寶之礦將來數年之後必爲古丈坪廳民無窮之利益以此爲養養可能也以此興教教可立也是古丈坪廳吉祥善事之大者三者惟疏河尙無頭緒再四思維亦惟有捐廉或設法挪借發奮自爲如礦務種植之爲者俾民間坐享其利於十年數年之後子孫相續至於百世民而有知其爲桐朱齊樂以相報乎民即無知亦盡父母斯人一日之青要其事則古丈坪廳最祥瑞之事與前者改土歸流改督捕爲撫民設

屯置防樹桐茶以輔農田之不足並列而七而八矣  
桐茶之利古民享之已久百年之農民不致以水田穀少致困者  
賴有此耳其始教民藝此者官耶民耶古宜白世祀之列於名宦  
鄉賢之祠苦無知者若依古者飲食必祭郵表畷必享宜爲位以  
祀始勸種桐茶者始不虛報本反始之心莫考其主名而爲之考  
略如此

古丈坪廳善事之未及致詳者

通考十二

知撫民事汪明善在任倡捐救嬰局惜字藏及義渡各善政今皆  
不可復見到任初擬爲之清理以徒勞無濟而止惟義渡一事意  
在必復傅紳慶餘感於其言獨任修橋遂有如虹翼然之觀於汪  
君當日之心亦可少慰萬一矣後之人其有益於汪公之造作者

幸甚

去年以敬節堂家庭教育之法發議無有應者意亦中止蓋必礦  
務疏河種植三者備而後有以爲經費之本則敬節育嬰皆其政  
之亟者不容緩也考政績者尚不以爲迂遠於事理賡續布之也  
可

古丈坪督捕同知治移改之詳見建置不復及

二 民生滋息之原因 吉祥善事之二

國恩 善事二之一 通考十凡四條

錢漕乃廳州縣民應有之輸納古丈坪廳乃仰沐

皇恩本境田土不納錢糧漕米只徵荒糧故方折數百里地丁漕米幾無僅有斯真

熙朝浩蕩之恩矣

俸餉文武衙門每年請領於布政使司庫者一萬數千兩民間藉以此項銀兩周轉計自建官設營以來

國帑所縻何止百萬而民間恃俸餉之餘以仰事俯畜滋生朝廷之特恩非前代所有也

穀米乃民生日食所資廳境山多田少顆粒皆珠定制每年山永

順縣撥解兵穀二千餘石來廳保靖之萬艾二倉撥來苗兵穀一百八十石民間以此穀彼此周轉以資其生皆

君恩之及也建營苗防百年爲穀已數十萬石矣軍餉所關至巨

朝廷厚德深仁不擾民間古廳目雍正七年改土歸流民不知役安堵無驚閱百年至乾隆六十年苗變越嘉慶二年而事定

國帑所縻數百千萬民無絲粟之擾自善後至今又享承平之福百年矣此皆我

朝仁政休養滋生於二百年中古之民父老子婦鼓腹嬉遊於深山之中雖以洪楊之亂鄰釁之乘而無驚至有不知有道咸同近年各事之故者斯真

忠厚流澤之長華胥桃源爲一境矣鴻勳履任朔望日與民間詳細宣講

盛世殊恩紳民感激合詞請建

皇殿

文廟開中學以隆

君師之仰瞻肅慶祝之誠心從此

國恩優渥人材奮興躋古丈坪廳於上國豈惟守土之幸哉是用

恭記

天時地氣

通考十一十二

廳境處溫帶之中故百產咸宜春日風雨調和不苦潮溼與長沙等處之卑溼迥異夏則草木濃陰不畏暑熟秋日收穫則功全保

古丈坪廳志

卷十二

十八

少遲餘皆甚早冬時雨雪應時高涼洞之轎頂山了角山之尖山丫施溪之筆架山地氣較冷積雪三四月始消田馬寨之三尖山亦然爲少異耳故民生其間無天札昏癘之患年穀雖無大豐亦少歉歲惟地利未盡闢蠻苗之習未盡化斯賴禮義薰陶之力耳古廳田少地亦未盡效材故雖豐收亦苦不足從未有以大有書者佑計田地所產只敷民間八月口食缺少四月藉助外援除國恩餉米布於民間外桐茶數萬金五場穀米雜糧鄰境源源不竭是以民苗能相安無事以滋其生也

三 建廳以來所見有之吉祥

吉祥善事之三

人家祥瑞

通考十二

序考

深山之中風俗太古衣冠樸茂飲食淡永常足以致耆老之年享最上之壽然而古丈坪廳邊苗之地土客之居六七族姓相處言兵事者常惴惴焉憂其民之不能輯和邊圉之不能常安以保其垂髦之遐算太平無事之優游乃自涵濡

德化二百年民安其業吏毋驚擾中間祇紅苗之役少有蠢動旋即底定至今言舊事者以鼓腹嬉遊登堂介壽長子孫聚宗族皆爲意中常事讀廬陵歐陽氏豐樂亭記此乃古丈坪廳至大幸一事也豈常事哉今爲列於吉祥善事以提耳斯人使知

聖朝之休澤爲不可忘矣爲二考曰耆壽曰貞壽耆壽

鄉飲酒之禮行而王道易以養老也天子養國老於上庠袒□割

牲執醬而饋鄉人養庶老於鄉飲酒□僕肅穆卿士大夫養老於賓射揖讓升下甚矣古之治天下者目天子以至於庶人祭用數之飭其次所致力者則莫如養老矣

朝廷鄉飲酒禮載在通典而天下府廳州縣舉行者今無蠻彝之俗侮老喜壯佼近世新說益紛舉古者敬老養老尊老之說而空之而反之勳意獨不以爲然以爲老成典型民之望而生民之始也如或慢老遺老則一切儼薄之夫雖少有才能勇力適足爲生民之殘致五洲之禍雖曰英傑吾無取焉如其安老事老率婦子兄弟以致力使老有所養老有所終則其才能勇力必不軼於法制防維之外成家卽所以匡國其爲才能勇力必可敬也嘗欲以鄉飲酒禮行於州郡之間求所屬之老而賢者致酒饋於公堂之

上率僚吏士民公服將事使儂薄之民環而觀之知老之可敬用消其儂薄之行人人親親長長以共尊

君國而天下平而事久未舉行禮無知者欲上於

朝其官未可言也用存其說於此

呂良美九十六歲外功全河蓬爲呂姓族所居疑其地人也以壽終於家

向文貴九十七歲以壽終於家 按廳之向氏土籍爲多疑文貴是其籍也

余宗信現年九十四歲

向永泰九十一歲以壽終曾募修三道河橋

危萬全廳治古仗坪人現年九十歲本廳屯長

按現年者輯略方修時也此上所載皆永順縣志古丈坪輯略所載壽民條中之人亦極簡每條祇數字其現年者□於何時終亦不得考任原文存之以示蓋闕今得之耆壽如下羅秀儒字伯通先世籍寶慶新化明季遷羅依保茅坪今戶口七八百人秀儒幼而岐嶷喜誦豳風月令齊民要術長世農業編次三書師之漸富人叩其術曰勤則不匱三□要指事親能求其嗜好弟秀科病足不事生產同居五十載諸子分析不忍離弟孔氏妹貧沒瞻其出成立卹鄰而勉以蓋藏勿求人爲高家塾兼教貧族因以成名業者頗眾道光己酉大饑預購糧平糶近村以無害道咸間屢輸家財助兵子姪五皆入監受職銜羅江繞茅坪西驛路所經倡集二百金置常田穀三十運春渡秋梁咸豐辛酉粵匪將竄來鳳村中

一日數驚戒鄉人勿動練丁壯以待有求易錢米避寇者周之嘗取顏氏家訓朱子小學切近語爲家訓四條子孫守之年八十而卒孫崇澤崇權同歲入庠崇本食餼人以爲耆舊之貽也

羅承貴本城保人商而醫究外科小兒科貧富延之無早暮卽行不受謝性正直不阿年八十六歲無疾終

向明證羅依保樹栖科人家貧勤儉致富周急排難稱於鄉里重修三道河橋墊款百六十千光緒十四年民饑明證售後到桐油古丈坪俗先用錢後兌桐油僅穫半價非至急不爲也得錢八十餘千以助近村賴以全活富者爲之感動八十八歲卒其族有明選今八十八歲親見五代亦有行誼稱於鄉黨猶能農作

張玉考西英保白岩人讀書力田號爲長者平生未上公堂今八

十八歲眼見四代猶爲童子師

張明仁係外功全保雞婆寨人現年八十五歲猶能健步與曾孫輩上山打野鷄誠實寡言鄉黨稱其正直曾爲營書識四十年無過犯

古丈坪廳之讀豳風月令齊民要術者獨羅秀儒老老恤族以富其家讀家訓小學能世誡其後嗣爲不負讀書矣孫輩有聲庠序間宜哉羅承貴向明證明選皆耆而善良者張玉考明仁雖無奇行老當益壯其得天獨厚抑豈無善而能也哉

貞壽

通考一

壽母歌於泮宮家人占於貞吉婦德之隆闡儀肅若穆姜之訓文叔以爲官箴共姬之詩衛國以爲女誠家有嚴親則析蔓之教令

子篤生室有萊婦則舞班之風老人心慰甚矣坤德有終乾元資始遐嘏爾錫苦節可貞此人家之奇瑞而壽世之休徵也余既次耆壽於吉祥善事之中而又得貞壽之婦若而人爲著於考夫綱常同踐女貞之才乃獨恒久歲月悠忽而堂北之萱乃以忘憂恭值

熙朝之景運乃以致之人家祥瑞之至大者也爲何如幸哉伍楊氏源寶女年十九歸伍立珍二十七歲而寡家貧守節撫子嵩福嵩□教養授室母道方盡而子相繼逝撫孫德欽由行伍從征粵西保守備貴州效力勦匪陣亡以例

賜卹氏復撫曾孫純嘏承襲今年九十五歲元孫繞膝五代同堂按氏之遇可謂困矣吾以爲吉祥善事者則以壽歿有定乃孫德

欽爲

國捐軀賞延於世氏亦元曾繞膝九十五而猶在殆將百歲過矣其謂爲善事也宜又按此本輯略節婦條原文不敢改易其言五世同堂者殊於事實不合五世者必相聚一堂今氏子孫多故雖親見五世而實無同堂之盛此輯略之疏也楊宜人本城保楊昌仁妻永順縣生員劉開煒女幼承父教明詩禮之訓于歸後奉養翁姑和睦妯娌相夫子以義婉婉柔嘉稱於族黨一子四女教之有則子能繼家女適人有禮法其孫曾方興未艾也生於嘉慶己未十一月三日是時廳制猶未改撫民氏家夫家尙永順籍也光緒二十年八月一日卒年將百歲矣入撫民籍又七八十年矣壽萱喬木家 國同光眞

熙朝之人瑞也以外孫向天培貴得  
貽封宜人俟彙案如例請

旌

貞壽之婦當不止此惟採訪者只此則古人之樸也夫世運遷流  
人心未漓將以還純返樸必在此婦德之修婦德之修則貞其一  
也壽其一也既貞且壽家運昌隆非一日之慶而百年之慶非但  
相夫子事舅姑以嗣以續之慶也必將育教國楨以扶世運古之  
貧民習於畸俗夫婦之好或不終朝吾欲敦薄俗篤琴瑟每於夫  
婦之訟示以齊一之義勉以綽~~緜~~之榮聞者亦多感焉  
朝廷褒揚節孝而於貞壽者尤加意門定曰貞壽之坊以五福之  
備必先壽得天之獨厚爲尤可敬矣

物類楨祥

序考

書曰作善降之百祥禮曰國家將興必有楨<sup>禎</sup>祥天人之應夫豈虛  
哉特以附會之詞太過則轉不足以生人信古者鳳階蓂莢實有  
其事君子藉以自奮厲其夙夜三代之下惟恐不好名好名之弊  
至於反常背德以邀之則惑矣要知天地之和氣自吾身之和氣  
相應致之吾身之和氣自諸事之順理致之在天地退處無心而  
物類自應之古丈坪廳古侯伯之壤也若其官與民有致祥之道  
則感於天地者未知廣狹爲何如而廳內之和氣必有異焉者夫  
用以考之以驗其究於他日

禾穗雙歧

光緒甲申年七月內西門外田中禾生雙穗是年書成大有其時  
官民之間必有和氣相應斷非尋常瑞事草木之華可比也  
煤礦金氣

光緒三十二年十一月初開煤礦在三道河之伏午者爲古丈坪  
廳開闢以來未有之局日夕希冀得柴煤以供炊爨捐廉數十竿  
倡之乃民間往往夜見有火光突起居民疑爲人家窖火趨逼之  
則無控煤木出輒相傳以爲得金乃今年三月可燒之煤仍未出  
而得銻鑛未幾又下一層得金鑛其苗甚旺有成粒之金竟如民  
間所傳之詞則火光之盛眞地方興盛之兆寶藏將洩千年之蘊  
也目火光上徹之後諸礦爭出若使實力舉行則古丈坪廳之爲  
古丈坪廳其爲布地黃金之古丈坪廳吾恐人將爭趨若五都之

市矣天豈不有深愛於古丈坪廳之民也哉

桂花有實

光緒三十三年正月初一日奉文

學部定章考試中小學堂畢業歸地方官辦理報於

提學使司照章給獎古丈廳高等官小學堂設四年矣適符畢業  
之期又去年冬紳民稟請捐建

文廟前殿恭奉

龍牌中爲

大成殿東西廡後楹爲中學堂今年三月又以憲檄屢催廳志鴻  
勳乃身自著之旣成一半此皆古丈坪廳文明興起之肇基而百  
年來未有之局也三月中浣古丈坪營丹桂結實如皂莢子而橢

長大不及寸其色如墨見者以爲古丈坪廳有志之始有  
文廟

皇殿有考試之始其兆至祥古人進步

文化之速必有見於數年之間者守土者藉以少酬委任之責把  
握芬馨與有幸焉是用詳之以備後人之考夫祥瑞者光緒丁未  
孟夏知撫民事董鴻勳記

湖桑布種諸生學農亦在三月亦文物之兆也自去歲開局經營  
三事赤手辦理惟河道尙無實行礦種皆已有頭緒漸而摩之持  
以無倦其功效祇在數年之內而兩者皆有嘉祥師尹惟日豈不  
幸哉

災變禍難考異 祥災之二

序考異 序考二

災變禍難之來君子以朝乾夕惕補救匡維有大難如夷禍爲福根轉以致與<sup>興</sup>盛之基者天變之足畏畏於人之不克自振耳然其間亦自有辨災變者出於不得預防而倏焉將至不見幾者必爲無可見慮焉預測焉其實亦事理之常任教養之責有土地人民政事之責爾室杼懷抱膝長吟若水旱癘疫之災天人物象之變其兆雖未見其理固自在籌防之策亦有常經君子循事而爲之備大人感應以消其災而弭其變徃往而然禍難事之既至也事已成局無所逃避君子安命焉耳然自後事視之則災變禍難皆其已往之迹無此疆爾界而前事者後事之師烏知今不異於古

所云也古丈坪廳自有天地以來卽有此土地居此土者自盤古三皇循蜚䟽侂以至秦漢五季若帝王之世諸侯郡縣之世皇朝雍正六七年以前若土司長官之世其爲災變禍難古之人憂愁爭攘者千辛萬苦而始得改土歸化之一日今皆不可考其異甚矣結繩文字之文質相去之遠也自雍正以來至於今二百有餘年其兵事祇見於乾隆六十年之後古丈坪首先率服永沾王化非災變也幸也已見於吉祥善事不再及光緒丁未孟夏鴻勳序

一 農田地之災患 災變患難之一

旱乾 考異一

光緒十七年荒旱

光緒十八年荒旱

光緒十九年春汪明善知撫民事以比二年旱穀貴艱食委紳赴常德武陵運米數百石佐以常平倉穀數百石在城隍廟設局平糶一次

光緒二十三年大旱

知撫民事汪明善委紳勸諭富紳籌銀一千兩赴常辦米又出常平倉穀數百石在廳署大堂平糶一次

光緒二十四年又旱無平糶事

水溢

考異二

光緒七年大水冲刷田地本城小溪橋 西關橋 外功全保河蓬之萬人橋同時衝圮

光緒二十五年大水冲刷田地此次較爲甚有陵谷遷變失其舊形者全境皆然

光緒二十六年知撫民事顏連沅以二十四年旱二十五年水穀艱民困稟經

大憲借儲備倉穀三千石由省運來交商發賣平糶一次秋後備價還倉

按自光緒七年水災後大水疊見皆經稟報未便請恤此年亦因旱水接年故請借穀平糶意仍援旱災而請也蓋廳境山多田少水易漲退被冲之田水退迅速仍無大害卽有受害亦因山勢高下隔閼平地澤農甚少非逼近四溪河者亦無大害故水災頻記而賑貸無聞至旱則雜糧不收民食已固桐茶亦害民用困竭害

不止於稻穀歉收故歷年遇旱必平糶借穀地方之情形所域者然也

光緒三十二年因外境荒歉外援阻滯時至五月糧價陡漲似若無市知撫民事李翊殞出借寄廩常平倉義穀並出常平倉穀數百石平糶在署傍設局平糶一次

蟲孽

考異三

光緒二十二年蟲荒

次年又大旱經知撫民事汪明善籌欸平糶已見上

光緒三十二年桐樹生蟲受傷外功全保獨重其蟲食葉葉盡而斃尙幸不成災

二 民居之災患

災變禍難之二

火災

道光三十年火災文武衙署俱燼

光緒二十年民房失火延燒城廂內外居民二百餘戶衙署并燼知撫民事汪明善隨時賑濟每戶給錢四百文共去錢一百餘串文

巡道委員賑濟每戶給錢八百文共折去銀一百五六十兩復蒙藩垣垂問以民已復業毋庸再賑稟復

光緒三十三年正月羅依溪市兩被火傳爲姦人思乘火竊物有遺秉焉查拏乃止

謹按

朝廷蠲租貸賦賑糶兼施荒政之修迥非前代所得比擬自數千

萬萬數百萬萬數十百萬至數萬之役屢見於國史淪肌浹髓至數百年惟古丈坪無大災荒卽偶有灾歉亦祇借穀平糶惟光緒二十一年火災有賑錢之舉爲數亦有限其災在古丈坪廳已稱巨灾此古丈坪廳之幸也然生齒日繁民業祇有此數若非洪施開利之政則恐他日重勞朝厯慮矣讀者念朝廷休養生息古人得天獨厚以優游於此志未修二百年以前之日月而勞來匡直輔翼振德以宏聖朝之文化行此志所言諸教養要政則修志者之志慰亦古民尸祝馨香之者雖民情無饜要亦在導之者之誠否民化日進則民智日高民智日高則父母斯民者之措施易而民之頌歌眞得其直道矣此願奢矣其何日償之

補考異

序補考

序考三

前考異旣成又採訪之得詳於考異者補考異所未及者以類分補之如下夫災變患禍之來事至而張皇事過而輒忘皆不善處災變禍難者君子於此臨難而懼持以小心擇以毅力天下事無平不陂無往不復藏器於身待時而動固將有轉也以古爲鑒以前爲鑒以已事之補救爲鑒以賢哲之遠識爲鑒無所事而不可鑒則一文一字皆寶若貞珉不厭求詳此考異補之所由作也讀者幸不以爲複

一 農田地之災患補

旱乾

補異考一

光緒辛丑年飢饉正月未米價斗一千餘文知撫民事顏運沅諭本城保富戶商人三楊三傅二羅八家領穀碾米在廳署大堂減價平糶每升八十文 又飭總屯長劉福臨百總伍德高辦理煮粥事賑濟每天兩次至七月新米上市方止費穀百餘石旋署永順府二年人以爲拯飢之報云

水溢補考異二

道光己酉年春夏之間雨水過多溪流陡漲數丈四月二十四日將三道河大橋打去沿河水田衝刷大半蕎麥無收米價每斗漲至一千四百文尙無買處一切豆粉雜糧吃盡豬羊牛馬亦盡餓者挖山中岩蒜白泥而食死者不計其數永順知府梁公兼知撫民事准士民之請開常平倉減糶斗價七百元救活甚眾秋收僱

溪口船隻赴常德之桃源採買穀米還倉老吏杜順之陰請行之也

按是年之饑可謂至矣亦只平糶而已非惟廳制含混久若無專地可指者又無地丁錢漕應行減蠲者故遇凶年僅止平糶又山路崎嶇轉運非易口求諸省緩何能濟乃此災一遇古人若忘一再訪求乃得其情形真足以戒後人矣

光緒己亥年四月二十二日辰時猛雨下降四山洪水汎澎湃而至將近未正陡漲數丈將校場並河邊碾房屋宇一概淘洗而去水已湧進西門沿河一帶幾成澤國然無辦災明文此亦見古廳水災澹於旱災地域爲之也觀此古知廳禦災之要矣

二 民居之災患補

補考異二

道光庚戌年八月十三日巳時北門卡房失火時值狂風大作黑煙漫天約兩時候文武衙署倉廩軍局民居房屋全付之一燼僅留城隍廟火藥局未在劫數知撫民事秦廷杰賠修衙署并賠補倉穀 按是年之後遂未修監有重犯寄永順縣監至今未復舊制

光緒二十一年之火災乃十一月二十日午時治城中街萬壽宮對面失火城內軍民駭急各搬什物並無一人救火以致滿城衙署倉庫民房皆成焦土僅下街幾家並城隍廟得免此次賑卹較周已見前不重叙

按治城道光庚戌光緒乙未兩次火患皆成巨災治城小而逼處少隙地又無救火之器比屋鱗次故遇災輒不可救自乙未以後

民間戒於前失多修風火牆以避患 按兩次巨災 城隍廟皆得無恙古人最信城隍訊案有不能結者盟神則已光緒三十二年十二月余結兩案皆得神力其一孤子某有山地其姑之夫家強爭焉界限頗清而其姑家合族以死爭不得直乃如其請准投盟於城隍其姑之夫家逡巡不前案遂結又有某人失牛合村有舊約被盜者聚而代尋不得則公賠有代追失牛之四人從事主取資贖牛五而返其四其一匿不退又不告盜之所在失主遂以知情控追者四人互相推諉再三訊不得結如其請赴神盟遂有逡巡認賠者案遂結苗俗有吃血盟神之習民間蓋亦染之特不必專飲貓血耳此風俗之善也古昔齊盟無瀆今之各國會盟皆有明神臨之意以約束其心思向來訊案者有不得已而質於神

之事蓋事窮則變如在左右敬恭明神宜無悔怒聖人神道設教豈直虛文實有神目如電者古之人常有開城隍廟刑具聲者陰陽分司理則然耳不足疑也固爲聯額以記於廟以誠古人而附其事於補考異

### 三 兵事消弭考

古丈坪廳自雍正四年設永順同知改督捕同知在雍正七年裁同知設知府治猛崗之日自初未有兵事彭肇槐效吳越之輸誠邀

君恩以衣錦廳亦不被征伐之師百年而有紅苗之役始波及古境而龍鼻嘴苗首先投誠丫家土人功在前敵古丈坪之克復亦在大軍底定之先其間受福息患無兵事之苦亦最早自是又百

年至今無兵事洪楊之役患不及古蓋自五代以來十有餘年兵事之確見於古丈坪域內者只有此數何幸哉洪揚之役幸不被兵事者一時籌謀之善有足記者因爲考以列於祥災之後咸豐辛酉年九月內髮逆石達開稱僞翼王率賊數萬將犯境官中拿獲賊探供稱大股賊匪意欲田鎮溪所直走古丈坪竄永順往龍山上四川時知撫民事保齡都司羅亨祿年皆老矣存城千總杜健元之父書杜順之獻策預備防堵甚詳左哨千總鄒元正帶兵百人往龍鼻嘴汛防隘調苗弁兵守城軍功杜大定帶各保奮勇團練自携資糧赴各險要防守將大路挖斷各寨糧食埋藏多安滾木檣石以便邀擊賊探有備趨他道而去廳不被兵蓋廳境萬山叢雜道路至險若擇要而守眞有一夫當關萬夫莫攻之

勢且其路又僻非有可欲於中賊亦不涎之故以一二百兵苗輔以團練之方遂消巨患於無形人謀之臧亦地之形勢爲之也故古丈坪內不亂而外患可消外亂而內宜靜守此則古丈坪扼要之兵事之關鍵也讀者其無忽之

祥災考預備策

小序

凡事豫則立不豫則廢爲政之道有廣狹無異致也比年興教立養設學以爲教養之預備蓋化民成俗教事也而學術不一則南轅而北其轍愈教而愈紛不可謂教也故興學非卽爲教乃所以爲教之豫備得其術而教始有基不得其術則教乃泯矣材藝智能養之事也而學不實驗則空言而無其實求養而失道不可謂養也故興學非卽爲養乃所以爲養之豫備得其術而養始有本不得其術則養且不贍矣雖然行省興學又

國學之豫備府廳興學又行省興學之豫備而其要皆爲致祥捍災之豫備吉祥善事實在吉祥善事也災患禍難實在災患禍難

也則將實在致祥捍患其必由學之實在以期其事之實斯可矣鴻勳往者爲文學興國策以諗於人於東人森有禮之書蓋有相爲發明者於中原之大勢古今之政術蓋有味乎其言之者西人自西徂東一篇首言中國貧人之多以爲政治困難之根此誠有見也將以使中原無貧人是在教養教養之極生齒日繁是在殖民殖民政策之後天地亦有窮期西人所言後世界末日之情形吾不得而測其究竟且

朝廷現方興學以齊一鼓勵神州之教養之術之豫備尙未及言殖民百年駒隙吾又何暇及殖民政後之經度古言百里之才非豪傑之士鴻勳材質庸下受任邊方才能之吏以爲不足爲而日揣揣焉憂其職之難盡實亦未能盡其萬一昔人之才真度越庸

下萬萬後之人必有能盡百里之責以勝任愉快者因存其文於志以爲廳災祥之豫備以備後之守土者之芻蕘

光緒丁未孟夏十一日董鴻勳序

原序

皇朝撫有中夏崇儒重道自

京師國胄以至行省府廳州縣廣厲學官力宗經術二百餘年人才習俗禮讓爲先家喻戶曉道一風同光緒二十六年庚子役後兩宮返蹕西安

詔內外徧立學堂改教授法程變考試向章於是湖南奏設學務處綜理全省興學事宜

大中丞山陰俞公不以爲不肖委司一切文牘稟承籌畫檄札旁

午時有以不急之務來相詰難者竊以爲不然教養爲官師應盡之責備材藝爲凡民當具之知能卽令閉關自守而黨會日盛生齒日繁亦不得不大興學校以厚民生正民德鞏皇圖於億載然而操術不得則聚林林總總之民而學校材藝之率由無準如艷舒之有儁材太叔之有武勇適足以滋亂階而啟鄰釁讀日本森有禮與美士大夫工商教士所問答雖各以所心得爲答至於道德不究學非而優愈以蹙生人之禍患慨乎其言之者異口同詞此非美國之私言也蓋嘗上下數千年帝王聖賢之言治術者莫不如是唐虞教胄而扑作教刑象恭滔天乃於帝廷三代之學備矣乃有移郊移遂甘誓奄征三孽有苞後世巨患奇變每在文飾姦言之徒太公封齊而有華士孔子治魯而有少正卯孟子相滕

而有許行此人皆才足以拒諫辯足以飾非其學當有過人之長非庸人不識字之流其亂之所貽常數百年而不已其餘秦漢百家之說皆專門學者之所爲主於一偏而不可與於大中經正之規若其道德既正則金土木石之士農圃林漁之業皆生人之職事德與道之所存皆足以明倫察物立本生道聲光電化皆格致應有之學明德至善皆人民當盡之學今方初立章程宜有以旁通其意而立之範圍使民生日趨於學而又實得學之範圍之實益以共奮發於

聖明之世此則有學務責者所不能已也今始言其所以必應夫興學堂之由與今策時政之要隨時問答積以成帙曉音瘖口以爲之辨冀皇朝學校之隆同風三代步東瀛而驅歐美並有以立

純善之學風邁五洲而稱雄森有禮之策策日本也今鴻勳之策策中國也不必避其名亦不必襲其體自以中國之興學者言之著者自叙時在辛丑夏五卷上

愛民第一

與治同道罔不興與亂同事罔不亡古今立政大要也其初意與究竟何如雖不能同出一途要其所設施皆曰愛民民爲邦本無民何以有邦民生有欲民息無止非實有以愛之則其欲不得其息不遂此今之言政所共知所謂愛者非僅輕徭薄賦賑災恤窮下寬大之文告禁貪酷之橫取已也土地之廣人民之衆富媪所產能力所營不日闕其未開之利教其無材無藝之人以進於明智而爭時會則年復一年所產猶是而民數累增分一人所營之

食而食眾人分一人所營之衣而衣眾人其必不給而相爭攘豪奪巧取大亂以積雖有仁君其奈之何取眾人財斟酌而用之使之生生不已勞眾人之力鼓舞其精神使勞者無窮其材知亦無窮比戶之人皆漸以禮義之風納於法度之治則天下無不可自生之人亦無不可相生之人兵事不興資用日饒乃可謂斯民父母矣輕薄之政其與幾何課士第二

今之言政者曰重士其尤知政者曰課士別士於凡民之中而異其禮貌重其登進如養驕子軼於法制之外則又寬其繩墨如護不材之子朝夕所講求不切於生人之日用保生捍患之良規此課士之大惑不解也有所學則謂之士所學精則士之名副士之實著天地既分人生其間農以爲食商以爲用工以爲器兵以爲

衛醫以爲疾分途並驚人乃得以自全於天地之間後之人承前人之所爲皆爲不得已之事學焉以承其基而拓其業用保我大羣故欲課士者必課之以小之以立身養身大之以教眾濟眾豈盡人人而仕宦之而坐以待人之給養而干城之哉世之言士者莫廢物然其未察已養兵第三

今之言政者曰強兵其尤知政者曰養兵兵不養不強教之糈之皆所以養之卽所以強之此未爲知兵也以數壯士間一孱匕之夫外侮可禁矣然使我九壯士一孱士彼十人皆壯士則必我敗而彼勝人無骨則不立氣之極弱者骨亦不舉民之於國也猶骨之於身也有一不可以兵者其國之氣必有所不舉而欲以敵全國上下一切以力戰之氣來侵軼者數十國其亦難矣今養兵者

未嘗於人身應有之氣與骨爲合國人民應具之精神而加意無怪文武分途之陋識尙存而日言兵制終爲紙上之談嚴凝肅殺之氣天地所以自立國之人亦全恃此氣以立於不敗乃曰人人宜兵由學堂出身爲兵之過也豈知兵哉

#### 通商第四

今之言政者莫不講求商務叩其所設施則曰寬商人之文網重商人之開通此亦未爲知商務者也商無定法羣以商爲戲朝利則爭趨夕折則爭避無一定之法以繩其後而爲之守故奸猾之人入焉無與國勢相維之思念則商之興落上不與焉要之商爲國中人民之一職合子姓而處一大室以此之物易彼之物則必有人焉任其事子姓有恃強巧取有作僞相欺者必爲法禁以平

其交易便之相安於人若出吾室而與他姓之室相交易焉則必使子弟任其事者察彼人之性情好尙防彼人之壓制牽率爲之導誨焉爲之獎勸焉爲之通功合作聯羣力以抵人之羣力焉其長者視爲吾財之運於彼一旦受虧吾首受其害其幼者視吾之所營爲合室之財一分一不得當則必損吾室之財久之而吾室將不能自立焉彼江海之潮汐一漲一縮於木體之巨流固無所虧損商必如是而後國可長存然則今商部之設商學之開豈僅曰講求商務以爲富國云云哉

#### 勸工第五

今之言政者莫不曰勸工詢其故則曰財日外流由於製造不巧思抵制之法兵器未精戰焉輒敗求保命之道此亦未足爲深知

工者也工之不材三寶閉塞一人之身而百工之所爲備萬物憤生此天工也牢籠萬物以爲我用則人工也今疾疫時作飢寒載道皆工之未至無以防其災而廣其生庸庸者坐以待斃而天地有形有質之物隔膜不以效用山海之藏莫窮地天之奧莫達精理仁心皆成虛語卽所稱學問終古無實驗之一日人身亦終古爲不靈之器矣故知爲彼談者未知通天地人之必由此以達彼也

### 重農第六

今之言政者謂歐美經濟學以農爲本富農業如是乎設學堂此亦未爲知農者也百穀之生最爲繁衍一歲一生一歲數生其理其時爲界也微精察始明若心知其意而口不能言口或能言而

手不能筆則其間之彼消此息時異而歲不同者必熟視而不覩身遇而莫明日用飲食不知不能遑問其他凡畜牧森林養蠶飼蜂事關田家者推闡之於此見造物天然之樂較之其他學問尤爲美滿室家君國由此而起禮樂兵刑緣之以生士能務此一切政術學術乃有根柢人民土著愛物心臧殖士於有恒之產乃以樹國於不拔之基豈僅曰效法歐美乎哉

### 明醫第七

醫之有師也久矣設學堂而教之與科第而進之則自今日效法西人始論者謂衛生保種強國健民於是乎在殊亦未盡其義刑法之設巨細受懲惟醫之施治善否例爲過誤亦從無問者逃於王法責言之外至乃以意爲醫庸妄之夫而有生殺之柄無是政

治也故學堂嚴以課之畢業顯以庸之慎重範圍之使日進焉醫術大明制以法律一切僧巫異說祈禱禍福之見不禁而自熄人道光明文化日昌國家羸弱之病亦不至以流於不救已  
茫匕大陸其曰有民愛民經國國如一身故首以愛民民有秀愚各秉於天納之於學所向無前故次以課士士之材者強以自立合體聯羣乃以堅固故次以養兵士而能立期於行遠不爲干戈交通貨賄故次以通商萬物百產受用於人土能工巧人物乃親故次以勸工民流不止國勢乃搖基峙農務士乃不驕故次以重農五常萬事肇始康強士明厥道國氣乃揚故以明醫殿之學堂之設大意備此矣

卷下

尊君國第一

天衍之說出政治家以兼攻取侮爲有國應盡之義責繁種不得已之政策至於朝野百爲處心積慮一衍說一談笑無不具此見解旁睨人國蠶食之鯨吞之強攫而竊取之神州沃壤黃種良質而無關隘焉無呵禁焉排山倒海而來在其人蓋亦不爲不止豈有倖免哉我

朝入關德澤至厚

聖政日新萬年鞏固日之不亡而能強以廢藩尊王也英俄之能振勢力屬地廣遠者以宗國之同心輔翼也美本創局法因大亂之後故小定於一時而非今者中原之情勢故我今日仕宦於朝農工商於市於野苟欲完吾種族免彼奴辱惟有乃心

君國力戒因循合行省爲一氣合種族爲一心大羣立斯大力生  
自足以制狂流而消巨患彼持破壞壞之說懷坐視之心者皆陷吾  
種於流血積骨之慘斃人自斃究亦何益哉

### 審官職第二

官各有職豈有冗繁而猥曰裁之哉古者酒漿籩豆乃有司存焉  
百里之地古君卿士大夫數十百人之所爲理今以責之一人而  
他皆間曹禁其事事雖有神聖不能求治况其上焉者大尤數十  
倍耶美其名曰地方安靜考其成曰廉吏曰聲名甚好至於風俗  
之敝藩籬之撤黨會之熾水旱疾疫之迭作老幼成人之不能遂  
生而成材皆誘之於不可知之數距治稍遠之處往往行同法外  
莫敢過問矧□有事而爲社稷衛焉水利糧捕乃農務經濟警察

諸學所朝夕講求而不倦者今之爲此官至爲世大詬上之人尤  
惡其言職之當爲者以爲廉俸太薄非若錢糧倉庫之官可以取  
陋規而侵蝕之以自養焉今不惜大盜起之巨費而惜捕官之重  
祿亦足異矣至水利糧員皆有自然可取之經費何如明予其人  
以辦公而示之以一定不移之限制使舉其事而講求焉則二百  
年來之修明已可以富國而強兵矣訟獄之巨細而必聚於一人  
也使民憚其難達而積恨以成釁亦不能分輕重以責任而惟以  
擅受例抑制之耳故我國京省之官不及其制者十之七越其職  
者十之三苟能審官之職使得盡職焉恐官之將日添設以求周  
行之置矣

### 慎財用第三

節用之說其名甚美而非經營天下之所宜言尤非今日時勢之可言一製造數百千萬一興作數億萬萬至乃絲粟而計之其終無舉行日矣賠欸之巨則又迫於強勢省羅掘以應使當日舉此之少數設學堂厚官糈取天下一切政事而整理之何強鄰之畏今或猶誤於節用之說必至百爲俱廢坐以待之甚不可也移無益之費爲有益之費雖多而不吝消無息之費爲生生不已之費雖拮拘於一時必充裕於他日官之不問民事民之不知國事也泛泛若水上浮漚相際此渙散之勢也今取朝夕起居相保之事一一合其資而代謀之眞乃慎於財矣此卽量事而受祿事愈大而祿愈厚天位天祿亦無慚焉節莫節於此矣豈如世所云節哉

講交涉第四

交涉至今日亦講之至矣竊猶以爲未也請觀於外各省設一洋務局地方延一洋務幕友客至而爲之欸接事出而爲之磋商恐人以交涉爲立己國取人國之政策無如此易於交涉也各國之語言文字不同各國之性情政始治不同各國來使主人之品位術業亦無一致此非可羣眾人而責之一人而備求之必有交涉專門之學必有交涉分門之人必有交涉一定之法則必有交涉類別之儀文宏綱細目繁文縟節一宴會一談笑皆有交涉類別不移之律例行乎其間則在我操之已熟在人苛之無辭一切教務路礦行船立埠各勢分途應付不踰常則以是爲有國交迪之義務非壓於強勢始以是爲支抵自然葛籐盡斬情誼日洽何乃空談持平而無可守之法徒重禮節而無必之條授權於譯者游移

於強勢問心無定見焉宜乎束手曰奈何奈何者多也

### 釐刑政第五

赭衣滿道路日有重誅此言政者知耻也鞭撻盈廷訴訟滿案言政者未知引以爲耻或矜察斷焉不知鞭撻惟輕其辱已甚訴訟既繁詐諛可知搢紳之士滿朝滿野不能相觀而善違言他事今學堂徧設兵農工醫商各業皆出於學則刑罰亦必因之以變重罪至纒首其餘盡易以罰鍰羈留一切監獄班管盡易圖棘之制高其閉閤兼施教術爲專門之典法無授權於胥吏務使人人悔改盡化鴟張則治外法權無可藉口而受我內治我亦保我族類使相親相愛不爲異說所搖動焉今

明詔屢頒政事具理然不急之文告無實之冊結猶併行不悖內

外不能一律各省渺不同風遷就敷衍坐廢時政宜一概釐剔使任其事皆能舉事之人行其政皆其必行之政蕩穢磨光庶政蒸蒸日上矣

時危勢迫異說紛騰尊崇君國外侮不興故首以尊君國承君立國官爲樞機官失其職國乃式微故次以審官職財慎其用乃能爲國興作一切歸於法則故次以慎財用交涉之難至今已極日事講明國乃能立故次以講交涉政之未理刑用斯繁政清刑措乃爲治源故殿以釐刑政焉夫事機不定國是乃紛主旨不明求治愈遠故約旨卑思不敢汎論高談願有心時局者詳焉

跋

跋之曰議者百其言而行之者無一焉行者百其政而究其指歸

至於完善者無一焉歲不我與精力有限以一人之心而欲挽回大局難矣以人人之心而欲挽回大局斯易矣以人人之心之力從事於學以達於政與藝實行其挽回之事焉尤易之易者也究心要政翼贊

中興尤此書之易也鴻勳自跋

今跋此策成於辛丑距今七八年矣所言諸要政與所設學堂之意海內已次第舉行而其實能踐如策之所言者尙待異日夫江都三策天人公孫宏倪寬晁錯所對州郡文學所論皆存史民之書近世講求實驗或且以空言輕之此文也有精思切論而後有實效行有實效西人言理想在諸科學之前天下未有事理尙未能明之於口而其事能有成功於天下者惟閱歷之後其事之果

否得行行之果否收效收效之果否比舊事之有益否則非辨論之而已必實驗之而後得而其所發爲言又必親切而有味吾無以自見於天下其言則容有一得致祥捍災之預備在此故不惜重言以明之采芻蕘者其切實行之而後知斯篇所言之少謬也  
鴻勳又跋